

鹿洲全集

戊辰仲春
重印
貳拾肆

鹿洲全集

卷之五

平其臺紀畧

序

史以紀事垂法戒夫人而
知之矣碩史才難得龍門
扶風而後寥寥數家愈趨
愈下宋元之間一望茅葦
況於稗官野史惡有可觀

者哉稗野之文鮮衷乎道
循訛走僻炫異逞奇悅
市井庸俗人之耳目有道
君子弗為也若有識有筆
據事直書即在一郡一邑
方隅治亂之微皆必以春

秋之直道行之雖稗野猶
正史矣平臺紀畧亦野史
之流也康熙六十年臺灣
土賊朱一貴作亂
王師平之鹿洲山人身在
行間目覩風濤戎馬豕突

鴻哀指揮戡定經歲餘而
後返其於全臺形勝事蹟
及軍中叅贊公檄謀謨具
載東征一集讀者自能知
之繼因當時市井道聽耳
食妄言臺事懼訛傳而失

其真將惑亂他年史氏之
聞見此平臺紀畧之書所
由作也其書以垂戒為主
使守土之官兢兢業業願
畏民岩奸頑之輩革面革
心共興仁讓是以起亂必

書長亂必書棄民失地狼
狽遁逃必書羣賊得志猖
獗恣無忌憚必書以明封
疆任重稍存玩忽之心必
至決裂潰敗不可收拾如
此豈不足為前車之鑒乎

自古作亂逆賊靡不身首
橫分史冊昭然愚氓或有
未盡識者即以目前朱一
貴竊踞海邦有地千數百
里有黨至數十萬妄擬王
公拜官封爵充盜賊之志

顧至此極矣曾不旋踵而
或殢或梟妻子親屬並受
誅夷作賊果奚益乎回思
守分善良安生樂業何等
愉快所以反叛亂之心而
作其尊

君親上之氣又不啻示之
標準焉嘉殉難嘉不屈嘉
守澎明臣節也叙調度叙
戰功叙擒撫予出力也置
身局外不以己名雜其內
示公也摠論其是非得失

疆境關繫施經綸而措之
治安又善後之良策也使
人人皆讀此書則在上無
玩忽之官在下無悖逆之
民千秋百載久安長治山
人之有功世道也豈淺鮮

哉山人平素以世道人心
為已任所著女學學準公
案諸書皆裨風化不為苟
作少時有志欲續明史綱
目旁求徵信及至京師
見明史館纂述未竣恐不

無是非互異之嫌又明人
子孫有向山人嘵嘵聚訟
者是以中輟慨然欲修宋
史未敢自信先纂唐代名
臣為修史試筆一書以質
海內今宋史雖未成編而

讀斯平臺紀畧亦可知其
史才之大槩矣紀畧成於
雍正元年風行海內者十
載舊板漫漶余為加評點
而新之因併叙其事於簡
端

雍正十年歲次壬子秋八
月同學弟天長王者輔拜
手題

